

¿É VIABLE EN GALICIA UN PLAN BASEADO NOS 3 R (REDUCCION, REUTILIZACION, RECICLAXE)?

Unha enquisa de Sondaxe publicada por "La Voz de Galicia" o 4 de Setembro deste ano reflicte que o 85% da poboación galega maior de 18 anos é partidaria de clasificar os residuos que se producen no propio domicilio.

Son sen dúbida resultados gratificantes para o ecoloxismo galego que poñen de manifesto actitudes responsables cara o medio nun aspecto, o dos residuos, que está sendo un dos principais problemas ambientais a nivel global e tamén a nivel galego. O ecoloxismo está de noraboa: de algo serviron os esforzos dirixidos a concienciación cidadá nesta materia. Os

datos recén revelados veñen a ser unha inxección de novos azos para seguir traballando.

¿Tomarían nota dos resultados os responsables do Plan de Xestión e Tratamento dos Residuos Sólidos Urbanos de Galicia? Por se non o fixeran, ADEGA enviou escritos ós distintos grupos parlamentarios, ó Conselleiro de Política Territorial e ó Presidente da Xunta, instándoos a que, en base ós novos datos, reconsiderasen o actual Plan de Residuos e o sustituísen por outro baseado na minimización dos mesmos, na recuperación e na reciclaxe. E é que tiñan argumentado que no noso país non

era viable unha recollida selectiva do lixo porque a poboación carecía de educación ambiental neste senso. Pois ben, sen máis campañas cas dos ecoloxistas, velaí a vontade maioritaria da poboación (na que, sen dúbida, os medios de comunicación xogaron un importante papel), en clara consoñanza coas tendencias e modelos dos países europeos más adiantados. Pola contra o Plan que ven propugnando a Xunta contempla a incineración para a práctica totalidade dos residuos, cando a media de RSU incinerados nos países da Comunidade Europea non supera o 25%.

A separación en orixe posibilita a recuperación e a reciclaxe (compostaxe incluída) e permite a reducción, obxectivo final e solución definitiva. A incineración é, na práctica, incompatible con todo o anterior. Unha vez más os administrados van por diante da Administración en materia ambiental: Galicia, contra o que se viña dicindo, non é diferente doutras comunidades e doutros países que sosteñen actitudes favorables cara a separación selectiva e a reciclaxe; se non hai avances reais non é por falta de vontade dos galegos e galegas. ■

Elvira Cienfuegos

O FISCAL XEFE DE PONTEVEDRA VAI ACTUAR CONTRA ENCE-ELNOSA POR DELITO ECÓLOGICO

No pasado verao saltaba á prensa a nova de que o Fiscal Xefe da Audiencia de Pontevedra quería levar ao Xuzgado aos máximos responsábeis da Celulosa de Pontevedra, por un presunto delito ecolóxico. Este pronunciamento do Fiscal é o resultado final dunha serie de dilixéncias previas que comenzaron hai catro anos. O titular do Xuzgado número 2 de Pontevedra e un advogado que exerce a acusación particular en nome da Asociación para a Defensa da Ria, viñan realizando un calado traballo para conseguiren demostrar que Celulosas e Elnosa cometean un delito ecolóxico. Nos últimos anos tamén se acumularon informes científicos (o último o da Wallace Evans) que demostraban o contínuo incumplimento da lexislación por parte do complexo industrial. Por todo isto o Fiscal

chama a declarar en calidad de imputado ao que foi xerente da empresa nos últimos 20 anos o Sr. Xosé Garrido, así mesmo terán que comparecer como testemuñas o conselleiro Xosé Cuiña, o alcande de Pontevedra Xavier Cobián e o presidente da Deputación Cesar Mera.

Esperemos que a solicitude do Fiscal ao Xuiz de novas probas para mellor sustentar a sua actuación, non demore o xuízo, xa que os informes científicos e da propia Administración son suficientemente concluyentes para proceder ao procesamiento dos responsábeis da empresa, e o feche definitivo da mesma. Para coñecer mellor esta triste historia pode-se consultar o dossier que a revista CERNA publicou no seu número 10, sobre os 30 anos de degradación que a ria de Pontevedra leva padecendo. ■

J.Pereiras

